

SU L' VOYE DI ST DJAQUE

Mâria Dèyi ! Qu'i fieûve tchôd ci prandjêre là, au plin mitan d' l'Aubrac*, su l'vôye di St Djâque. Li solia tapeûve si télemint fèl qui nos cachin.n' après on camoussau po nos mète à l'ombe, oudobin on p'tit richot po nos rafrèdi one miète.

Au coron d'one pîssinte, dji m' ritrove pad'vant one vîye tchapèle. Au d'zeû d' l'uch, il èst scrît : 1049. Pâr chance, èle èst douviète ! Dji mousse didins èt, qué plaïji, il î fait bin fris'. Dji laî m' pèsant satch su l' costé. Foû d'one potche, dji prind li p'tit lîve qui dj'a todi avou mi èt m' calepin po scrîre mès sov'nances.

Dji n'a nin co l' tîmps d' m'achîre qui dj' tûze dèdja. Dji sondje al masse d'ovradje qui m' ratind en rintrant.... à m' soçon Piêre qui vike sès dérins momints... à...

Adon, i m' rivint one powézîye da Maurice Carême* qui n's-avans pris al pitite sicole :

“Dji roterè por vos qu'à pwin.ne à roter
r'waîtant li stwèle qui vos cachoz après.
Dji causerè por vos qui n' sèt causer
au bon Diè qu'èst là po vos bin choûter
Dji priyerè por vos qui n' sèt priyî
avou lès simpes mots qu'i faut po d'mander”

Dji douve mi p'tit lîve, insi, à l'astchèyance. Èt dji tchaî su ç' bokèt ci : “*Ni v's fioz nin tant d' mwaî song : vos n' ralonguiroz nin d'one rawète vosse vicaîrîye !*” (Matieû, 6). C'èst bin l' vraî, don !

Dji n' sé nin poqwè, mins dj'a l'idéye d'ètinde one vwès qui m' cause tot paujêremint : “ *Dji so binauje di vos veûy, là, addé mi ! Léyoze véci tot ç' qui v's-avoz d' pèsant su vosse keûr. Li rèstant dèl vôle vos parètrè pus aujîy !*”

'L èst tîmps d'è raler, ca dj'a d'mèré là quausu one diméye eûre au long. Mès soçons mi ratindenut au viladje, dandjureû. Dji r'prind m' satch. Mins dji n' saureu 'nn'aler sins rèsponde à l' pitite vwès : ‘ *Mi èto, dji so binauje d'awè passé on bon p'tit momint addé vos !*’

Bernard Van Vynckt

L'Aubrac : pays auvergnat entre le Puy-en-Velay et Conques, sur le chemin de St Jacques de Compostelle